

人物志

十室之邑必有忠信滎雖褊小代有傳人唐世尤盛前志詳矣乾嘉而後百數十年間其政事文學武功彪炳顯著者固須登錄備採於輶軒即忠義孝友耆德隱逸以及方技流寓苟足矜式里閭亦何可聽其湮沒續志人物

政事

申不害周人鄭之賤臣學術以干韓昭侯昭侯用為相內修政教外應諸侯十五年終申子之身國富兵強諸侯無侵韓者申子之學本於黃老而主刑名著書二篇號曰申子

案劉向別錄云民間所有上書二篇中書六篇

續滎陽縣志

卷八

人物

一

河南商務印刷所印

阮孝緒七畧云申子三卷茲據史配原文補

陳化龍字騰九秋社人幼嗜學八歲就傳授書莊誦終日無倦年十六入邑庠十七食廩餼益勵志續學先達見之咸歎服焉未壯膺鄉薦主講汴源書院四方學者翕然師之年三十九選授息縣訓導督課有方士風丕振三任已滿當銓知縣辭不赴以勤職留任又數年推升歸德府教授宋郡之士恨相見晚從而請業者日益增加在任七年以勞績升國子監博士太學諸生引領而望若景星慶雲爭以先睹為快到任五年以衰老致仕年七十有九以疾卒劉石安先生贈以望重北斗綽楔祀鄉賢

張榮先城內人紹載六世孫嵩謚玄孫少家貧從叔父逢源攻書雖
饗殮不給而誦讀不輟性孝友十八歲入邑庠十九歲補廩乾隆
丁酉拔貢以教習期滿授知縣不就設教於中牟倉太史家與太
史論學心慕夏峯之爲人專務實學戊申登賢書丙辰大挑知縣
請改教職歷任偃師鄆城教諭及門受業者恒數十人朔望集諸
生講學於明倫堂訓以孝弟忠信之行闡明濂洛關閩之道弟子
無不服從新進入學凡納贄者悉聽其便多寡不計也計典屢膺
卓異以知縣用終不就一時名士眞儒皆出其門或有勸其著書
者乃曰吾之所欲言先儒已言之終身行之不能盡復何言哉嘉

慶十八年歲饑署內啖糟糠乃捐廉以濟鄉族卒年七十有五子
豹變優廩生事繼母以孝聞孫又房增生恩賜副榜至性過人母
卒泣血酒肉屏絕

李再可字仲思曹李村人清進士籤分山西委署興縣到任一日丁
父憂卽匍匐奔喪歸服闋補甘肅寧遠縣知縣時新疆回民不靖
廷議西征奉總制那檄畫破賊三策又丁內艱卸任起復詮授廣
東三水縣縣爲盜賊出沒之所至則聯營弁勵兵士督緝捕盜賊
屏息縣苦水患爲設圍田法水不爲災民人德之爲建生祠旋調
新會俗侈悍素稱難理豪富殺人多出金代抵再可執法不撓舊

習頓改值歲饑屢稟上憲求緩征不獲命請解官去邑人互相勉
曰無益於民反累於官非義也踴躍輸納旬日而賦稅已完後致
仕歸卒於家廣西左江道楊彤如銘其墓曰勗哉夫子神清貌古
理宗濂洛績茂邵杜治繁理劇來感去慕

孫樹之字果堂靈椿岡人父篤邃於經史應試時學使疑文非已出
就而詢之篤恚遂不復試以授徒終樹之少孤事母至孝母氏劉
躬紡績兄均力於田勉之就學遵命不怠一日自塾歸母出糠
餅一以授之曰此余所不忍卒食以遺汝者樹之感極而泣勤奮
攻學學益大進年十九入邑庠道光乙酉考取拔貢朝考後分發

山東初攝鄒縣繼署蒙陰未幾補禹城縣知縣禹城民最患漕車
胥吏因緣爲姦至車敝牛仆而猶未已樹之曰此民受禍實官爲
禍也亟捐資改派役爲僱役而其弊去復爲修學宮勵書院嚴保
甲勤判案在禹數年民愛戴之如父母旋調入荷澤知澤蠹役
向爲民害遂嚴以馭之境內大治時蝗入境方捕之野忽產蛙出
而吞之事頗涉怪民以爲神任滿復回禹城民不能留製匾頌德
直赴其里懸諸門外始反制軍某經禹城鐸家丁爲暴於館人樹
之縛而責之詣制軍請罪制軍反改容稱謝其不畏強禦有如此
者後因母老告歸不復出嘗訓其子曰州縣易爲民造福尤易爲

民作禍汝曹幸不爲此如爲此當以吾兩言自省自少至老手不釋卷日有所爲夜必注之於冊晚年建宗祠置祭田修族譜設義塾汴隄河決捐錢四千緡以助城上道光丁未歲大出積穀千斛以活村人咸豐初手訂堅壁清野章程行於汴西賊至恃以無虞卒年七十有一子七欽昂欽冕能世其學

李檀字心香號槐南圈李人幼號神童過目成誦性豪爽尙義氣遇有侵凌人者輒爲不平鳴由拔貢中本省鄉試咸豐癸丑成進士以知縣分省浙江適餘杭積匪胡萬成霸糧漕毀稅關加以亢旱民騷動官缺人無敢承其乏者上憲知檀才委權餘机篆聞命即

往有雨隨車民情大安匪亦聞風斂迹移任錢塘父老苦留不得祖餞十餘里去後未幾萬成故態復萌餘杭民赴錢塘愬之者絡繹不絕爲白上憲派兵剿之檀先往與餘紳張虹橋密計遣三百人僞爲助賊者在其左右故兵甫交鋒胡匪就擒衆即奔潰餘杭民感德爲建生祠以報其功在錢塘六載案無留牘松盛鄉地高苦旱爲之開渠民利賴之又倡捐修錢塘江路以便往來粵匪犯浙檀適病上憲強起之使守獨松關乃抱病往約張虹橋爲助賊不敢近旋帶威武軍與士卒同甘苦戰輒勝克復淳安等縣賞戴花翎以知府用病篤乞歸至漢口卒方在籍時寶興局款存鹽當

店生息咸豐三年粵匪過境當商被搶歇業檀稟縣出示民間所有當店衣物悉令送還隱匿者罪之賓興局款得無虧損遂買地爲永久計故後三十年合縣申請祀入鄉賢

孫欽昂字子定號師竹樹之長子也少隨父禹城任內讀書目數行下道光己酉拔貢朝考一等以戶部小京官用咸豐乙卯中順天鄉試丙辰成進士欽點翰林院庶吉士己未散館授編修旋丁母憂在籍倡辦鄉團以功加五品銜賞戴藍翎甲子簡放廣西學政粵匪初平伏莽未淨率請就近調考唯欽昂不憚逆氛不畏瘴癘毅然長往得人最蕃崇重節孝奏請由學臣辦理制曰可甲戌

充教習庶吉士協辦院事又充奏辦院事本衙門撰文光緒乙亥充武英殿纂修功臣館提調實錄館提調賞換花翎加二品銜簡放福建興泉永道署理糧道次年到本任駐在廈門華洋雜處交涉棘手欽昂示之以信將之以敏處之以公夷夏皆服俗好械鬪嘗以單騎推誠勸諭相率帖服甲申法人起衅兵逼馬江清廷意在求和遽將兵艦撤回欽昂曰敵心叵測不一懲創不足以攝其心而寒其膽守臣不聽馬江失守人皆服其先識創立同善局民有訟事飭赴局申訴爲自治之先導廈門四面環海土田絕少貧民常有不葬者欽昂乃捐廉置義田若干畝廈民觀感葬皆如期

未幾告歸士民攀留罷市有泣下者年七十二卒於家

孫欽晃字子實號友梅樹之季子也性警敏卓犖不群援例官大理寺寺丞同治壬戌中本省鄉試戊辰成進士授刑部主事大司冠薛允升倚重之平亭疑法足著挈令充律例館提調升員外郎擢郎中充秋審處坐辦庚寅充通州坐糧廳監督八月簡授廣西慶遠府知府調署桂林府知府期年回慶遠本任土司有饋千里馬者嚴拒之告其子曰此輩世襲貪婪所畏者郡守耳一受其賄何以表率群吏乎宜山某生績學士也院考將臨群以冒籍訐之欽晃爲白其冤某生得入泮調補桂林首郡時承平日久屬吏多諱

盜不報欽晃嚴懲之吏不敢欺盜風乃戢巡撫張聯桂保薦人才題曰剛明果斷守正不阿戊戌大計膺卓異首薦辛丑權右江兵備道壬寅回桂林本任癸卯以疾乞休紳民感德泐去思碑以誌不忘方在桂林時家鄉荒旱兌二千金糴粟賑濟全活者衆及回里飲助族鄰尤孜孜不倦甲辰冬病革語其子曰吾歷官中外垂三十年惟期上不負國下不負民家計之有無非所關也汝曹宜做好人無貽門第羞言訖而瞑年六十有九

孫炳煜字耀庭號藜閣三十舖塞北莊人質少魯而苦於學父督責綦嚴炳煜發憤至忘寢食弱冠入庠中同治丁卯舉人戊辰聯捷

成進士以知縣分發湖南署石門縣躬行郊野詢民疾苦凡力所能除者必爲民次第去之丁父憂歸里服闋署會同縣境故多盜且健訟炳煜日坐堂扶弱抑強週淹宣滯每率丁壯親往捕盜殲其魁餘悉宥令安業或問其故炳煜曰凡不法之徒當令自新疾之已甚則必亂要服其言戊寅補華容邑境北枕大湖一日水勢怒鬻隄幾陷炳煜忽至險處糾集紳民指陳扞禦方略衆皆踴躍從事不終日而隄完固巨賊據九峯山自稱九龍山大王四出劫掠炳煜偵知募勇八百人合汎兵百餘直抵賊巢猝擊之獲三百餘人並擒其渠合境遂安邑有命案爲蔡豆紳之姪主謀拘至將

懲之巨紳具函哀懇太守亦爲之解免卒置之法積勞卒於官孫顯家字季謨號煥堂邑之馬莊村人幼而勤學刻苦自勵每日必早起寒暑無間最服膺有志者事竟成一語同治癸酉舉於鄉光緒丁丑成進士籤分戶部主政適豫省凶隨項城袁文誠公辦理賑務特爲本縣請賑屬歲登遂置義倉返都後深見器重於閭閻學丹初蓋閻性儉樸孫亦儉樸故有針芥之投也時天下多故廷諭六部主政皆許條陳時政得失卽上摺剴切敷陳深中時弊頗蒙采擇提升員外郎方冀大用齎志以歿

王家三字伯乾清優貢朝考以府經歷分發湖北由法政學堂畢業

應法官考試以正七品法官仍留湖北補用充湖北高等審判廳民廳推事調充馬等檢察廳檢察官兼檢驗學堂提調民國二年任命爲河南高等檢察廳書記官長三年八月應知事試驗取列乙等籤分湖北署理建始縣知事建始僻在鄂省西鄙毗連巴蜀土着則匱豪富勢強民益窮困下車伊始即訪民間疾苦實心撫字擾民之事一切罷之嚴杜請託不徇情面豪右斂迹民始安業每日坐堂親受民詞立判准駁案無留牘獄無滯囚時以川滇多故鄰境紛紛倡言獨立賴素爲民信仰且能先事防範剴切曉諭指陳利害故建始獨不爲所動事聞給予七等文虎章建始爲由

武昌赴施南孔道向例軍過境當出夫每逢傳夫差役執票下鄉叫囂追突鷄犬不得寧家三稔知其害時有武昌軍赴施南乃捐廉雇夫兵已出境鄉里多有不知者期滿卸任兩袖清風行李蕭然合邑紳民遮道攀轅不忍其去年尙未及強仕偶感時疫竟至不起世多惜之

文學

張玉柱字凌霄乾隆甲子舉人天性篤厚志行端方與兄玉成弟玉金克敦孝友父嘗誨之曰爾先高祖承彩公輕財好義入忠義祠曾祖正眞公順治辛卯舉於鄉祖維岱胞伯祖維岳維嶠焚券疏

財濟貧恤孤軼事俱載邑乘爾等勉之勿貽祖宗羞玉柱善繼先志設教四方聆其緒餘成立者不下數十人進士李繼可李再可舉人張玉琳陳其蘊任澤和等俱出門下著有四書存疑心解待梓

孫景新字明甫父天錫有田數畝悉讓於兄乃經商於須水鎮爲景新擇名師晝令肄業於塾夜則督課於肆景新幼穎悟弱冠入庠道光庚子舉於鄉以目疾未試禮闈設帳授徒垂五十年施教之旨先器識而後文藝尤精於左氏春秋傳嘗援引以斷時事動中理解故游其門者多博洽宏通之選性嚴而介取與不苟交友處

世惟期無愧於已不求有譽於人皎皎然不爲流俗所漸染也

呂榕字蔭南趙溝村人天資明敏髫齡入塾十三經即能背誦顧不屑於章句中討生活恒以聖賢之學自勵竭力事母割田讓兄豔稱於當時道光乙酉舉孝廉淡於仕進以繼往開來爲己任四方之士多就之者不啻仲淹之設教河汾惜天祿不永未臻學易之年卒然抱道而去士林悼之李再可爲撰碑文稱其英年壯志銳意進修已卓然有以自立非後世俗學所能及信不虛也

陳經綸原名清桂字卓五號介眉城內人少好讀書及長入庠屢戰棘闈不售人有勸其揣摩風氣者答曰讀書以植品爲先非爲應

試計若舍己從人非以文媚世耶吾不試則可媚世則不可咸豐年間亳匪犯境後人心驚疑風聲鶴唳輒言寇至經綸館於某氏家集諸生講中庸如聞鳴金聲弟子皆失色請輟講經綸曰未有驚耗賊從天降耶力持以靜講如故既而始知爲馬逸鄉人逐馬所至諸生服其高識後以恩貢就直隸州州判卒年八十餘

王作新字振萬世居安仁里馬家砦祖坤習儒醫父重早卒依母暨伯父母成立常以未能事父爲憾即以事父之道事伯父事伯母如母每得珍味必歸遺之己未嘗先食也人傳爲考叔遺風云性肫摯竺友于視從兄弟如胞兄弟撫猶子如己子從子十餘人各

有所成就皆賴其教養力也束髮受書即蜚英聲迨食廩餼益勵名節嘗手錄四書一部爲弟子講解必使其就日用上體出味之如食菽飲水淡而不厭其心始安蓋得於先儒反身錄者深矣從遊者百餘人或具體而微或得其一二無不恂謹莊重望而知爲王門弟子生平愛人以德見義勇爲族無雀鼠之爭里絕吏胥之擾接人一團和氣持已威武不屈咸豐末團練徧天下滎陽紳民亦倡和之團長某仰其名望欲引重之作新知其不法誘以利弗應脅以威弗懼百方囹餌終不入其牢籠後某敗死人始服其膽識晚年讀書善養浩然之氣歲越古稀依然童顏卒以明經老於

牖下著有四書章旨一卷

張儉字花邨原名芳辰晚號柳堂幼穎敏讀書日數行下尤喜韓文發明性道年十三應童子試榮令羅公頗器重之旋入邑庠食廩餼文名噪一時顧不以此自詡也居恒慕魯仲連王彥方之爲人淡科名竺孝友同里百餘家數十年無涉訟者族鄔少年不營正業或爲不義聞誠立改甚至終身不敢復面其感人如此光緒丁丑歲奇凶襄賑務活人甚衆豫撫旌其門絕無德色祖元會精醫術父春仁務農業儉跨竈繩武傳家不廢耕讀濟世兼涉歧黃意謂良醫功同良相固不必預人國事也從子雲以名孝廉知湯陰

事克貽親以令名蓋得其教者爲最深而儉僅以明經老殆所謂道積厥中無所歆羨於其外者歟

孟盤銘字右箴大孟村人歲貢性篤實博聞強記文典贍而品端嚴唯嗜讀書不預外事言博學者必歸之其子昭澄字璞卿童年入泮弱冠食餼以恩貢就州判職人品學業綽有父風

汪歲愷原名樹楷字卓如南關人性警敏有綺思爲文援筆立就滔滔不窮每一藝出爭相傳誦即遊戲之作人亦愛而重之以廩貢就訓導職未仕而卒

馬鑑字心鏡又字秋塘號竹齋晚號索東逸士邑之喬樓村人性沉

敏而好學少時家酷貧常寄食外家間從舅氏樊讀又嘗從父受書於四方父名德峻邑之老諸生也十四歲父病負米採薪侍湯藥三月不少懈旣而父歿幾無以殮舅氏貲助之始克略具衣棺自是益清苦建志舌耕筆耨文名漸起弱冠入庠旋食廩餼每學使至必拔至優等浙江瞿芹波孝廉在滎署閱卷謂縣令陸仲彬曰諸生中若馬某者即置吾浙亦當出人頭地邑令李竹邨常推爲文壇健將熊芷怡亦常語人曰馬生文精實樸茂頗肖其人乃卒不得志困於訓蒙凡四十年教人務先植品次及於文有閑檢不修者輒面斥之爲人閱詩文改刪不遺餘力故受其教者成就

頗多嘗就館於靈椿岡孫氏家從孫師竹太史受文法故所爲詩古文辭均典瞻有法所著有未可堂古文稿未可堂詩賦索東聞見紀實錄未梓存汲縣中州文獻徵輯處其他事迹均見於姚廣文西平所墓志銘

李渤字仙瀛號杏莊樓李村人賦性凝重精明內蘊不露鋒釳童子時卽不妄言笑不輕舉動幼孤家貧其祖成旺愛近文人渤能勝衣欲使讀書而力不給渤母劉氏以紡織備脩脯乃令從蔣貢士學蔣賞而奇之曰此生瞻視非常將來定成偉器旣令人學不可中輟吾極知爾貧勿以束脩爲慮渤遂發憤苦讀不數年博通經

史旁及子集初學文落筆成章見者驚爲宿構年十七以家計窘迫就館授徒志學益堅二十二歲補博士弟子員二十五歲中同治庚午亞魁光緒庚辰大挑二等署南召縣教諭補原武縣教諭改內黃縣訓導歷長洞陽書院汴源書院繁陽書院凡其所至向學之士雲合景從室不能容其教人以敦品爲先常曰吾人讀書宜將聖賢所言從日用倫常間切實體驗徒務高遠無益也被其教者多經明行修卓然有以自立次亦不失爲謹厚之士生平學力務求實殘平易近人不立崖岸而取與則一介必嚴潔身自好不問外事而大災大困則挺身拯救不避艱難不恤毀譽己亥歲

歉赴省請賑合邑蒙福車馬差徭積弊已深庚子之變兩宮西狩滎當孔道疲於支應有破家蕩產仍不能免者惻然憐之集紳董議改章先是同治末年有劉某倡此議佈告已出鄉人羣起毆劉事遂寢或勸之以爲前車之鑒渤應之曰苟利百姓何計一身毅然行之定爲每畝錢三十文設局支辦推渤長之辛丑回鑾隨方應付事集而民不擾且以餘款集穀備荒舉行各新政今猶利賴之所爲文沉實樸茂純以理勝邑中碑銘多出其手卒年七十四李鎮南字湘臣柳溝人世代書香幼孤母孫氏教養成立生而循齊童子時即翹然異衆外渾厚而內精明不喜遊嬉不妄言笑六歲

從舅氏孫承天受書日數百言能曉大旨未弱冠入邑庠旋食餼有聲譽序厭當時舉業專講聲調不求根抵乃肆力於六經百子史鑑性理諸書故其爲文氣息濃淡湛然神遠一時名士多從之遊光緒乙酉舉於鄉辛丑大挑一等以知縣試用籤分甘肅委辦新關粥廠奉公潔已下受實惠上無浮糜以書生本色羞事逢迎鬱鬱不得志未及一試而卒

呂鐸字振甫增生呂家河人家貧而勤於學教人務敦實行講席危坐終日不炊晏如也既卒門人記其修已教人諸大端立石村外孫綜源字博臣號象菴欽昂季子也性聰敏幼隨父廣西學政任內

凡詩賦文詞一覽即能爲之年十七回籍應童子試以冠軍入泮旋食餼又隨侍福建興泉永道任內得名師指授學益進光緒乙酉以選拔中試丙戌聯捷成進士入翰林己丑散館授職編修在籍守制主講汴涇書院士林翕服服闋晉京供職歷充國史館協修纂修庚子隨鑾西京歷書艱險和議定扈駕北旋充壬寅補行庚子辛丑科鄉試同考官甲辰改就知府分發直隸曾充大學堂總纂學校司幫辦一時編輯之書皆其手訂丁未委署遵化直隸州知州未赴任而卒年五十有四

丁以松字貞夫城內人幼沉靜穎悟過人氣息靜穆弱冠後偶得陸

王遺書若有夙悟遂屏詞章一以尊德性致良知爲事適湖南黃恕軒先生與陳州孫立庭魏肇峙講學於明道書院乃負笈往敦行實踐造次不苟冠昏喪祭一遵古制從之者頗不乏人滎邑士風爲之一振歷任新鄭高小學校校長本縣勸學員皆勤於其職及本邑創立女校膺校長兼教員女學日見發達卒年五十

武功

陳增祿字荷萬獅子村人幼業儒改試武學使張之萬一見奇其貌曰此將才也遂拔冠童子軍中咸豐戊午鄉試第二己未成進士點御前侍衛辛酉英人逼天津都中戒嚴增祿扈駕熱河餐風宿

露艱苦備嘗同治初南還四年選授陝西潼關都司旋升浙江衢州府游擊因兵驕卒怠大加整頓上憲以增祿訓練有方奏調寧波後營游擊方則衢州時有齊匪倡亂制軍某欲率師出增祿曰此小醜耳何勞大軍遂僅帶本汛兵往不兩月果削平民皆安堵旋聞盜驚攻劫富商增祿單騎馳赴擒渠以歸十三年三月卒於官

孫欽昱原名欽嵩號友松樹之三子也性慷慨善排解鄉里重之咸豐初土豪王景仁假辦鄉團抵抗官長欽昱倡義奮呼鄉民響應率衆直抵景仁所聲其罪殲其魁境內以安及捻匪蜂起欽昱聯

絡諸寨共謀守禦賊至率衆出殺數賊奪其騎而歸縣尹奏其績
舉都司旋因協辦西征糧臺改補東河通判卒年四十有四
李其升字小香圈李村人多謀足智曉暢事理決疑理紛迎刃而解
甫弱冠隨宦浙江奉委帶兵防獨松關料敵設備動中機宜有戰
皆捷賊不敢犯以功保縣丞留浙江補用加五品銜賞戴藍翎其
父檀以疾予告歸隨侍湯藥檀道卒扶柩旋里營葬畢不復出邑
中諸公事多賴規畫如修築城垣河工辦料戊寅散賑事體繁重
合邑紳董皆慎其事以致遲疑不決無從著手其升乃因勢區處
秩然有條成算在胸故事集而民不擾建家廟修族譜亦各嚴正

有法鄉鄰遇有紛爭無論若何糾結一爲調處兩造悅服郎君廟
舊有義學規模狹隘倡首擴充 改舊觀因興國寺寺款建設義
學至今兩地各有國民學校卽因其基礎也汴源書院經費支絀
請於王縣令蘭森蠲免書院糧漕以資補助又以節出餘款置買
地畝擬在須水鎮建立新書院命名汴流長未底於成而卒事隨
中止此歎今歸洞陽高等小校

茹玉堂字仙甫茹寨人勇敢多智膂力過人性豪爽尙義氣好急人
難不畏險阻年十四以鄉團互鬪赴控京師歸途至鄭州適張大
鰲由密縣起事攻鄭州州牧黃建三募敢戰者玉堂率同行十數

人應募請爲前驅開西門出與賊遇於孟寨玉堂挺槍直衝賊陣衆皆披靡一戰殲焉時有巨匪蟠據大紅寨官軍往襲至鄭聞其勇邀與俱玉堂允之比至相其形勢曰寨後險峻賊必不備若以大隊攻其前吾十數人由寨後攀藤附葛緣崖而上破之必矣官軍用其計玉堂乘夜率其徒先登賊果潰走官軍欲其隨營以訟事未了辭歸咸豐庚申毫匪犯密縣營於觀音堂逼近邑境玉堂帶勇士防堵於滎密交界之三岔口賊恃衆欲奪隘而入玉堂督隊力戰殺數人賊乃引去辛酉八月賊大至玉堂率衆杜禦衆寡不敵士多戰死退至尙爐橋僅餘十數人而逃難者多未及城玉

堂乃奮勇扼橋賊不得渡數以健馬硬衝終不可得比逃難者八城賊由別路麴積城下玉堂奔萬山寨次日乘隙歸城其族祖景昌恐其有失出城尋覓玉堂率衆追之不及景昌過害於茹寨西收其屍而還玉堂不習兵事遇賊敢戰不懼不撓抑亦難矣使出爲世用有所建樹終老田間士論惜之

忠義

白慶堂字介平三李村人父珩品端學粹慶堂幼承庭訓警敏異常弱冠游庠旋食餼中年學益進每爲文博雅沉摯動與古會天性忠孝不假修飾讀書遇忠臣義士奇節異行輒慕不已咸豐庚申

毫匪犯境居民遷徙殆盡慶堂堅臥不動或勸其暫避慶堂曰吾忝列膠庠若臨難面逃揆諸朝廷養士之意無乃有闕卒不去賊至脅之以兵慶堂罵之遂遇害事後奏聞朝廷悼惜從優議卹奉旨入忠義祠世襲雲騎尉

丁黑丁樓村丁陽太次子也咸豐十一年毫匪擾境將至矣村人逃走一空陽太以步履艱難不去黑再三催促終臥不起黑自歎曰大難臨邇置父不顧偷生苟免於心何忍守陽太側亦不去陽太長子九玉之孤子廣臣居城中聞賊至登城望之見其村人多至城下不見其祖父陽太與其叔黑縋城下回家尋覓或曰不見村

中旗幟飄揚煙焰冲天乎一人獨去何異羊入虎羣廣臣曰死則俱死坐視祖父之死而不救人何賴有子孫哉乃竟往賊旣退鄉人悉歸見黑與廣臣陽太同遇害事定里人以孝子賢孫萃於一門公請旌表入忠義祠

汪廷貴汪溝人咸豐十一年毫匪擾境廷貴與遇於惠廠南溝匪欲降之不屈遇害

汪廷魁汪溝人素學拳法咸豐十一年毫匪過境猝遇於郭堂南溝廷魁自恃其技奮勇與戰衆寡不敵遂遇害

同時死難者百有餘人事後彙案請旌入忠義祠惟此二人見

遺據採訪冊補識於此

孝友

范有字春生早失怙兄弟五人有居長母老弟幼食指漸繁地數十畝不足糊口遷居鄭岡距家三里許每晚必歸家省母稍有微恙輒涕泣不食歷十數年率以爲常同里稱孝無間言諸弟有過多方勸諭痛自刻責必令其真悔而後已密邑舉人韓鵬銘其墓曰若作室肯構肯堂若稽田惟畝惟疆蓄之既厚兮發之必光德澤綿綿兮福祿穰穰奧其宅安且康應逍遙乎大周之陰汴源之陽范培欽恩貢生鄭岡人幼孤痛不及事父事母有至行母享大年孺

慕常若嬰兒非有遣未嘗少離左右與伯仲兄相友愛每事必請而行年愈老情好愈篤培欽與仲兄各一子伯兄四子培欽與仲兄謀各撫伯兄一子以爲異日均財計宗族至今稱之卒年七十有五邑人孫欽昂誌其墓

張廣傳字經海增生寬厚有量讀書極博父性嚴勵謹遵家法承顏喻志能得其歡繼母趙氏待之虐曲意承順事之惟謹趙氏有親子偏愛甚廣傳與弟廣業安之若素毫不介意父歿趙氏迫令析產自爲處置厚薄懸殊親族不能平廣傳曰母命不可違也吾與廣業能安之不可以是傷母心未幾廣業卒其異母弟將產蕩盡

養田亦爲所賣趙氏乃依廣傳度日廣傳妻王氏土家女明禮義識大體事之如初趙氏嘗謂之曰吾回憶往事悔不可追汝夫婦孝順如此吾對之自覺愧煞當記吾言以爲薄待前子者戒趙氏卒殯葬訖賣田地八畝爲異母弟償債

馬天朝事親必備甘旨父性嚴急和言愉色以悅其心兄弟析居推讓田畝十取其一

馬天雪母病嘗糞以卜休咎兄弟和睦家門雍肅

馬萬貴性至孝幼失帖家貧傭工奉母母多病出入必用小車力載以行

張知臨幼失怙年七旬朝夕不離母側咸豐庚申皖匪入境村人逃避無餼糧者數家張悉周之前廣西學政孫欽昂贈以淇竹先聲匾子生員行炳仗義疏財有父風

李獻可監生幼失怙恃出繼胞伯未幾伯父伯母繼歿喪葬盡禮堂兄某與族人興訟急賣己田六十餘畝爲寢其事而家以凋零堂姪釐保代爲買養贍田三百畝固辭不受隨兄再可宦遊廣東邑素養兵三千海船十數隻以防海寇頒發帑項不稍折扣弊政悉革獻可襄助之力居多焉

蔣霖膏增生聖端之繼子也既應繼視繼父之精力尙強爲購妾生

子霖育並一女撫養一如同胞霖育患痞疾百方醫治教養成人弱妹出閨裝奩倍於己女繼母王氏性極嚴奉養惟謹即加以呵責愉如也聖端謀建祠堂不果霖膏承厥志卒建祠村側舅氏無依迎養於家有張朝聘趙進財者一貸蔣百金一借錢二百餘緡蔣鄰其貧悉焚其券其德多此類

張照離字赤舫廩生胞兄華亭早逝嫂蔣氏哭夫喪明奉養如母以終其身

徐萬恒弟萬順夫婦早亡己析居矣一子尚賢不能自活收留撫養爲之娶妻分己田之半與之

傅大興字瑞菴幼有孝名兄弟析居已久姪繼善繼起貧不能自存乃慨然曰此皆父母之裔忍令其至此乎遂各與地二十畝親族爲之立碑以彰善舉

賈鵬字翼雲兄弟析居後弟實田產漸沒子亦殤鵬復與合居食同器寢同榻實先卒衣衾棺木置備完善以次子珍承弟嗣

張芳蘭號晚晴邑庠生員家世儒素有至性事親柔色怡聲或逢責讓愉而益恭年五十矣對兒女言雙親時事輒流涕事兄柳堂如嚴師居兄喪哭之慟曰嗚呼吾昔但知兄之可畏今乃知天倫之可樂而兄竟棄我去矣張不事生產或饋粥不給采野菜以爲糧

誦讀之聲常達戶外服膺楊震四知及司馬光事無不可對人言之語常居坐右以自箴貌清癯待人無蹊町然深惡不義怒時義行於色壯夫奪氣則中之所存者可知矣卒年六十一

李謙生員咸豐三年太平軍過境謙負母以逃猝遇匪匪義而遣之壽八十四村人有紀念碑

馬兆麟字靈甫號琴舫生員漢寨河人幼失怙事母暨叔父母惟謹與堂弟武生友麟友愛極篤同居終身家庭和睦

丁繼元須水鎮人家貧幼失怙有至性諸弟俱幼爲人傭工以奉母教導諸弟皆使成立愛之如子弟亦敬之如父雍睦之風溢于閭

里母年九十餘繼元已七十餘矣依依膝前猶若孺子一飯不在側母幾不飽初承堂伯嗣其二弟繼坤四弟啟元五弟五元割膏腴地若干畝別爲堂伯立嗣銷毀繼約以慰母心一門孝友繼元實啟之胞姪華松由生員保舉孝廉方正

周大行庠生舌耕養母不就遠館昏定晨省事必躬親母欲出遊手推安車周行遠近人呼爲周六孝子以其行六也

吳誠家貧父老且病欲食肉割股烹之以進其情可憫

李苡錫字禹同號嵩泉曹李村人性恬淡喜讀書博通古今能文善書不慕仕進持躬極嚴天倫尤篤父公車患痰症肝氣易動能先

意承志以博其歡母王氏暮年患痿痺艱步履樓居寂寞苾錫招素與歡洽之鄰姥佐談爲樂王氏喜絃歌每飯命瞽矇侑以曲風雨寒暑無間苾錫於昆季居仲兄輔臣弟逢夏皆友恭廉讓析產悉聽其兄區處與弟未嘗有異辭怡怡綽綽不啻同居時也李萬合字鐵居母失明妻不善於奉母遂出之飲食必親造自供耕田必告所往歸至門即高呼曰兒歸矣母應乃喜能泥工人有求者必母許諾又得人奉母乃往至夜雖風雨必歸天將寒則請其兩妹爲母作衣履其長妹即舉人李渤母也

孫承家字怡堂庠生以弟顯家貴貶贈中憲大夫賦性寬厚居心平

恕當時號爲四君子之一中年喪父事母魯恭人每飯侍側年已垂白猶依依如孩提母有所求竭力致之必得乃己弟顯家官戶部迎母京師母思之不置乃千里往省不憚跋涉母見之乃大喜母歿葬如禮不用音樂識者躋之兄弟五人承家居長父歿即廢舉業主家政地少人多不足自給拮据萬狀供給四弟顯家讀書不以貧而中止友愛出於天性家庭之間一以和藹相接每得食物非徧給諸弟已不先食弟亦俱感其德式其化故終其身門內無間言視堂弟振家定家如胞弟視諸弟之子猶其子實行感孚遐邇共仰言孝友者必歸之

張國瑾城內人幼失怙同胞姊妹二人友愛純篤既嫁猶資其衣食以慰母心曾患眼疾既失明猶痛不可忍欲自盡忽聞若母呼聲憬然曰吾雖失明母尚有子若死必益增母悲及目復明咸以爲至孝所感有叔父二人貧無立錫不能自存養生送死皆自任之叔父所遺女友愛與胞姊妹等其篤於天倫如此

王志本賦性溫良居心平恕嚴以持身寬以容衆與弟志立志書友愛極篤自少至老式好無尤門庭之內怡怡如也經理家政井井有條因子弟村質教以耕讀業有專司家無閒人五世同居男女丁口九十有七未嘗犯齒人以爲休匹張陳

孫秉直靈春岡人幼失怙事繼母李惟謹李撫而愛之不啻所出李生子三福林秉諒秉璫秉直主家政友愛諸弟無微不至常恐有拂其意弟亦皆克恭厥兄雍雍睦睦門有至樂人無間言家世業農福林出繼所承田產不能自贍秉直與秉諒兼營商業家漸裕視福林所無者即給之凡納國稅備年節皆代爲之福林若不知有其事者雖分爨儼若同居供給秉璫讀書豐脩晡延名師不吝貲財必使秉璫滿意而後已秉璫亦循謹自愛恐負兄意努力上進遂入泮旋被舉爲孝廉方正秉直去世已數十年家風猶存至今罔替

李舒錦字又白小李庄人息縣教諭博學善屬文著周易指南四卷篤於天倫兄弟五人舒錦行三父步雲績學未遇以貧故有志未逮之事甚多臨終囑舒錦曰他日貴顯必成吾志時兄弟皆未娶各謀食一方舒錦甫弱冠舌耕兼謀生計收集兄弟共營一業家乃漸裕既貴爲父請封典樹碑孔道建宗祠置祭田修族譜皆所以承父志也生平熱心公益尤重興學須右乙種蠶業兩學校皆其手創

李召棠字芾菴廩生十三歲失恃哭盡哀父前無戚容恐傷其心事繼母蔣氏如生母蔣氏生一子亡事繼母徐氏亦如之徐氏嗜鮮

魚無寒暑親求之必得乃己徐氏生一子一女又亡李體親心皆善撫之衣食從豐惟恐稍違其意他人視之不知其爲異母也卽弟與妹亦自忘其爲異母也

張其誠字翼信劉衙衙人家貧鄭有族人張景生無子欲以爲嗣其母欲許之其誠流涕曰母老弟幼何忍遠事他人况努力同心寧不能博升斗粟耶卒不允事母終身兄弟式好子亦成立

張明良字賡堂劉衙衙人性至孝家貧竭力耕田以供菽水嗣其子貴以裘裳進明良曰昔以貧故不獲以此奉親今服之於心不安終其身未嘗一著其弟夫婦反目明良曲爲調停使各相安

張銘勳字子健燕溝人母胡病癱症銘勳親侍湯藥五載不懈事繼母如母與其伯兄仲兄均最友善丁酉拔貢曾任高等小學堂教習教授不倦士林推服

黑慎思城東北黑寨人監生行端貌古好學不倦弱冠失怙母衰弟幼耕而且讀孝兼以友未幾家道漸裕二弟亦相繼完婚正擬專心學問以遂初願詎昊天不佑母逝弟亡喪葬以禮痛不欲生次弟遺孤曰宗禹三弟遺孤曰定禹教養並施均列膠庠姻親王錦堂就傅宗禹時年已七旬有奇尚不時口講指劃薄以持躬厚以待人天性使然初無勉強

義行

陳丹書字敬亭與弟景清墳簾叶奏得親歡心爲納貲入太學而丹書恒以士不科第爲恥起文社作士氣滎鄭兩邑因以成名者頗多縣試向無考院席帷布幕不蔽風雨士輒苦之丹書乃請於官經始營構不數月而廣廈告成滎士從此得庇廕矣餘貲設賓興局士有應鄉會試者頒送資斧勒爲定章汴源書院年久頽廢亦復倡捐重修義囊慨解清咸同間巍科疊發皆其培植力也歷任長官無不敬重其人知縣羅委辦河工料保舉八品職銜丹書夷然不以爲榮嗣以姪增祿貴貤封武顯將軍

鄭樹棠監生村值榮密通衢大雨壞道輒修治之倡築鐵佛寨以避寇捐錢四百餘緡

馮文仁慷慨樂施道光二十七年歲饑鬻田五十畝以濟村人全活無算壽逾古稀臨終焚券數千緡

徐明耆老嘉慶癸酉大饑次子萬興貿易得銀百餘兩盡與族鄰之貧者拾鈔票二十餘紙失主李姓來尋即與之

張如良精醫富而好仁雇工與鄰有隙縊鄰樹上鄰畏訟求如良如良憫其無辜乃以已田易錢六百緡恤雇工家爲息其事子二孫七皆敦古處孫復曾孫珍瑞俱精醫有祖風

朱文成字斐然道光二十七年歲饑秋霖害稼謂其子金棟孫敷堂曰連年歉收餬口不暇何以種麥出所餘麥分給貧乏鄉鄰頌以誼敦桑梓匾額

魯中陽生員精針灸善種牛痘堂孫王棋生匝月失怙恃命其媳乳養成人有白姓名魁者賣妻度荒中陽出資使魁贖之俾令完娶魯中清監生道光丁未歲饑村鄰徐姓趙姓孫姓俱絕糧欲周之而無餘資乃典田十一畝分濟三家

魯中道監生道光二十六年買崔姓地三畝有奇次年饑憫其窮還之村外有河每歲修橋以便行人

張文衡生員雍正七年捐穀二百石入義倉助賑知縣張贈以洪我襟度匾額

蔣法成耆老嘉慶癸酉歲饑同里楚誠心楚慶心室家不保有離散之憂以錢二百緡周之年豐償歸固辭不受邑孫太史贈以仗義疏財匾額

楚于衡居臨通衢拾綢緞一箱還之失主知縣王贈以好義高風匾額

李釐保字還之號一堂監生性慈善家斗較市斗略小凡收租糶糧小斗入而大斗出嘉慶癸酉大饑出米三百石賑鄉里二十一年

與蘇宸舉等六人創社倉六間首捐穀百石爲同人倡

李公車字文輅學問淵博不求仕進事繼母以孝聞有楚俞二姓子被匪人賣之煤窑李百計拯出之修汴源書院捐五百金修城捐三百餘金道光二十七年饑焚契券十餘紙恤貧出粟米數十石助賑撫憲程賞給匾額

李公溥字雨農監生修書院助河工各捐三百金道光丁未出粟數十石濟貧乏撫軍粟旌以綽楔

方桂林監生道光癸卯祥河漫溢倡捐兩次襄辦河工料務不辭勞瘁疊蒙藩憲額獎

劉應修事繼母以孝聞心惻怛遇孤貧則加意矜憫石工某子來朝生即失恃應修令室人李代爲乳養外孫楚丙戌暨功服外孫名進德者皆幼孤無依應修收養教訓使能成立邑恩貢朱炳煜爲撰懿行碑樹之三家店

王居宸字寰一監生業歧黃精運氣嘉慶癸酉歲饑族姪六七歲失怙收養視如己子授室後使返本支恩貢范培欽記其軼事勒之貞珉

王允修字德符城北河王村人精針灸通歧黃全活人命不可紀極針鬼崇口眼歪斜尤爲拿手每年審察時令若何預購各種藥物

遇鄉里之貧乏者診後即付以藥藥到病除不受其值村東首舊有水口一座年久失修蕩然無存雨潦剝蝕幾斷交通允修怒焉憂之提倡積穀生息之法不數年成數可觀身任總辦之職開工于光緒三十二年春成而潰潰而成經營數載未嘗勞倦比三十四年秋始完好無缺造福桑梓迄今利賴勒有碑碣以誌其事趙文星字奎五歲貢生邑南槐樹口爲車馬要路旁有深壑輒遭危險文星倡捐置地墾闢孔道行者便之密縣歲貢李雲昇爲記勒石

高選字萬青舉人高遷之兄見義勇爲不畏險阻道光年間邑民要

求免附加稅聚衆至縣署繳耒耜官問誰爲首乃挺身自任時有委員到縣即帶赴省歸案年已八旬竟卒於獄邑人義之榜其門曰慷慨赴義並立義行碑以識不忘

蔣抑高父鋒銳有行善抑高承家範和光謙德爲一鄉望二十里舖義和坊遺銀五十兩於櫃底尋不獲忽憶抑高日在坊中使人問曰或先生用乎應曰諾即照償年終掃櫃原銀宛在設宴謝罪抑高一笑置之生平好施不居其名遂於醫尤精眼料施藥濟人子紹文孫逢源不墜家風

張琨字冠珉監生喜交文士重義輕財濟人之急恒若弗及朋友告

助如量以與不給則貸於人而已負償家以此中落終不改其初度

蘇世興字太恒例貢生每冬設粥濟貧子廷舉值嘉慶癸酉歲饑出穀二百石賑鄉里孫英超曾孫紹德救難周急世濟其美

陳安邦字燮臣施田興學儲穀備荒現有碑存

陳文煜字煥堂築寨防寇出粟救荒置祭田增學田族鄰勒其事於石

王庚家非素封儉於自用施衣食以恤凍餒暑月則施茶水村北遺址多年尚存孫翰曾孫謙吉俱入邑庠

馬泰福字申錫道光二十七年飢出穀一百四十餘石賑貸鄉里歲豐償還曰非望報也竟不受衆以義行可風表其門

劉其芳字桂五號香峯性穎異過目成誦十二歲能文年十五應童子試默寫五經號神童弱冠入泮旋食餼有聲黌序值中原多故絕意仕進以明經終生平不高道學之名而日用行爲動與先儒相印合晚年與伯兄其枝議割膏腴地三十畝創立義學手定章程刻石以垂久遠作勸孝歌男女各一卷言淺意深愚夫愚婦莫不聞而興起子澂字蓉舫學問淵博謙和端謹言動造次必循禮法士林推服

馬凌雲勇而好義毫匪犯境被虜者衆追救不敵乃曲爲關說脫離於難者三四十人

劉得山性孝義叔會鰥而貧自出資財爲娶妻以延後嗣

劉天叙字典甫號慎齋監生創建宗祠立義塾今爲國民學校

孟廣照與弟廣林陸續施地六十畝設立國民學校

方清魁字梅村翰林院待詔七世同居光緒庚子辛丑出穀賑鄉里捐資立學創修方砦河石橋清帝回鑾償耆老銀牌鄉人爲立沒思碑汜水趙東階撰文

陳廷魁字友梅耆德法程孫光緒十八年拾遺金失者至悉數畀之

不染絲毫失者係大隗鎮李大興李太旺無以圖報以拾金不昧額其門

張德銳施地十五畝於王庄西南設茶菴以便行人供茶者種地無稞租密縣舉人侯之翰記其事刻諸石今其後人將地收回菴廢申文恒有義行民國四年六月二十四日大水沿河廬舍漂沒其子浮水撈一皮箱出封鎖宛然昇之家戒勿啓以待失者俄田福生至言相符遂畀之

蔣克謹字慎堂亦字責己性沉靜其學以居敬爲主誘掖後進必以身教故游其門者多務實學如歲貢孟盤銘拔貢孫淳源舉人李

渤皆有儒者氣象生平義舉甚多有楚姓貸錢數百緡力不能償爲焚其券郭姓貧不能娶慨助以資特其一二之表著者耳

王衣先好公益道光十年捐庄基一處作試院地址有捐宅免差碑記

王永生字壽極好施與道光二十七年饑歲終出穀十八石有零濟村鄰子化天孫端俱歲貢

周隆槐西人性孝義民國六年遵父文書遺命出穀六十石賑鄉里陳啟時居近南北大道炎夏行旅苦渴無水啟時憫焉設菴施茶又恐久而廢弛施地四畝以固其基菴邊一槐大可丈餘蔭能覆畝

行人便之今呼其地曰茶菴崗

鄭振中武生性好義光緒三年歲大饑在崔廟鎮遇一鞏縣人馬姓携一子求售索價五千子名聚啼哭不止振中憐之曰吾有子不願再買子也使到吾家讀書年豐聽歸今付汝錢十千可乎馬姓感謝而去後氏死絕無家可歸鄭即爲之婚娶與地三十畝住宅一處令其自成一家

陳明理喜施濟民國三年歲歉以穀二十餘石散放村中子賡良又益之以米鄉里爲樹匾立碑以頌其德

李懷松監生樓李村人幼失恃依寡嫂成人家貧隨父營商於外有

得則遺之家以贍其嫂及姪渤登賢書家小康族人王保年老無依懷松生養卒葬堂兄福山携家謀食於外卒無以葬亦率人搬還葬之又爲買庄築室居其子媳有繼子營葬已開幕其近族有異議葬幾停懷松慨然自俱飲食率人爲葬之議遂寢

袁天一原名韻蘭字國香侯庄人優於學精於醫學足以成德達材而不居功醫足以起死回生而不求名處衆則從善如流疾惡如仇立品則不諧於汙俗獨行古道一時文人學士薰其德沐其化共推爲三代上人前孝廉侯化元爲其高弟嘗稱其行詣以風世勵俗

方清泰字怡臣幼奇貧與弟清傑艱苦自勵以經商務農起家兄弟皆寬厚周恤族鄰惟恐弗及村南有京水行者病涉清泰兄弟修橋數十年無間戊子河決清泰自須水歸遇十數人臥路側問之答曰行李盡失飢不能起邀至家飯之次日按路遠近給資使歸歿後人追思之爲立懿行碑於村外邑舉人李渤爲撰文

法振清監生輕財重義恤貧周急不求人知三伏施茶於千層橋至今罔贊又施丸散以濟鄉里山神廟前有懿行碑

王瑄佛古垌人傳家有道教子弟以義方各擇其才性所近使任士農工商各有專業家無閒人世世相承垂爲家範門庭雍睦同居

已歷七葉鄉里匾其門曰迹踵陳張

劉萬仁字體一家素豐好施與光緒三年奇荒餓殍遍野以工代賑使壯者得以就食設粥廠以食老弱全活甚衆時項城袁文誠公爲賑務欽差聞其慨捐二千緡助賑急爲請獎以彰其義弟萬和萬生俱獎直隸州州同姪化之獎貢生

張芝芳字香泉篤於孝友以醫濟人親友延請遠不辭勞愈不受謝有患乾甲風者甚危求醫取前醫方視之曰頗是但歸芍輕耳就原方當歸改一兩白芍改八錢一劑而病如失有暑月病疫者求醫方中用麻黃三錢應手汗解或問曰疫病忌麻黃暑月尤甚用

至三錢之多何以立效曰有生地八錢故耳年逾八旬術益精濟人益廣既歿人思之不置爲樹懿行碑李渤爲撰文

姚其濬字心泉邑諸生姚岡人性孝友尤睦於鄉鄰設教數十年循循善誘多所造成家甚貧窶宴如也惟以不能濟人爲憾教子有方其長嗣有源賑鄉里助學校捐秋闈合邑試卷種種善舉皆承先志也

徐元吉字旋甫板劉劉村人生員素與曹道人善道人將死囑元吉曰吾埋金某處人不知也及死元吉集村人掘之得金值數十千以之生息逐漸買地今之國民學校經費即從此出村人義之勒

石以頌其德

張建標字曉城歲貢生薛寨人充安仁保董正公正廉平鄉里依以爲安以急難告者必極力濟之有甥女程氏適楊門王姓甥媳宋氏均早孀家貧矢志守節建標不時津助以慰其心

任濬字哲臣邑庠生京相城人博學多聞長於教授誘掖後進惟恐不及在槐林關帝廟起青雲社親閱課卷自備膏火一時才士多出其門嘗設帳洪佛寺貧寒子弟免納俯金排難解紛尤其所長丁濟庚原名青選字子萬號須坡須水鎮人恩貢性亢爽不隨俗俯仰扶持善類保衛鄉閭人共稱之河橋規則皆其手訂晚年以所

藏書儲之汴溪學校該校經理張忻爲記刻石校中

趙友蘭號香谷須水鎮人增生績學善書曉暢事理衆皆悅服爲須水寨長維持商務調處鄉黨各得其宜

李寅字方白歲貢生圈李村人父甘霖早卒賴母氏撫養成立以不獲事父心常耿耿事母極孝伯父沾霖遇之有恩及長感不能置割良田二十畝贍其老不受心殊歎撫其女如胞妹厚其裝奩適張氏厥後猶供給弗衰教其子芝田成立外祖父母歿貧無以葬力飲之內姪周姓貧不能娶慨助以資使之行聘生徒中貧無力者却其脩脯至辦團練備賊寇皆其餘事

王瀚原名鋆字金生邑庠生洄溝人家貧舌耕多所成就尤精歧黃遠近延者均不責謝子孫篤守其訓書香綿綿永世無替

陳清傑字漢三邑庠生邢村人幼嗜讀性淳樸與人未嘗有所私鄉里有爭每不聽有司而聽清傑庚子歲侵由省發款賑濟曾慨助資若干緡其樂善好施本於性生民國元年重修洪同寨以素行公正推爲寨長

王曰賢字伯舉城內人祖三錫歲貢生著有春秋義例若干卷賢幼失恃祖若父又相繼沒以貧故未能葬人有勸其娶者則泣曰親未葬不能爲人子敢望爲人父耶營葬如禮後家漸裕鄉里戚好

貧不能葬者賻之流離無歸者周之有趙姓者其子久客於外家赤貧姑議醮其婦婦一女僅三歲賢惻然憫之僞爲趙子家報而遺之金其事遂寢賢家僅薄田十畝嘗謂人曰吾非不知爲子孫計但人所急皆吾親歷之境不忍復見也吾子所處之境已優於吾留有餘以遺之足矣否則徒長其遊惰也卒年六十有五里人感其德同姓十世之外仍持期服

張鴻勳字翼臣金成長子也嘗購族人住宅與已比鄰積數十年食指日繁至不能容終不忍促令他徒一日族人詣之曰吾自售宅後居此復三世矣君待我厚甚今請致之鴻勳曰然則爾何居吾

今有曠宅并田數畝以畀汝可也族人深感謝之

魯邦秀字書升號萬峰蘇坡人名諸生也嘉慶癸酉大饑劉際泰牽連訟案死在旦夕以田二十畝貸錢五十千邦秀不受給麥三石六斗價值六十餘千以濟其難卒二十年王曰美爲撰懿行碑稱其排難解紛類仲連輕財好施類子敬長子仲陽咸豐戊午科恩賜舉人三子正吾孫秉周俱列鬻宮書香綿延弓冶繼美此碑爲傳臚牛瑄書

蘇炳燦字生光蘇寨人性至孝輕財好義承先人志嘗貸資於鄉人不責其償及炳燦卒鄉人議償之資以萬計其妻周氏拒弗受鄉

人私謚曰孝義邑人王欽表其墓

孟居敬光緒二十六年歲饑出穀二十五石分給本村之貧者人感其惠頌以爲善最樂匾額

李舒英原名紹先字肯堂以捐助城工保獎監生歲歉平糶本街應繳糧價獨立代償以恤貧戶

李榮昌字華亭太學生創建遇龍鎮初等學校培植後進民國元年秋歉收麥未種村人多乏食慨然指困賑恤五年又饑盡出所存粟以濟村人

丁青山字月樵堂張村人家貧業醫光緒四年春在史村集上拾錢

續滎陽縣志

卷八

人物

三十八

河南商務印刷所印

票三十張失者皇遽欲自盡丁悉還之後失者持錢五千至其家酬謝辭不獲已遵父命捐入本村會中

喬生銀字麗泉太和村人幼貧以農商起家稍有蓄積即分所有以周窮困命長子金水捐鉅資創義塾三子邦彥任教授培養一方子弟鄉里借貸如量以與並不責償數十年無間民國二年饑於該村按戶計口給以粟米一方蒙福村人周運昌撰世德記刻石樹之官道

孫來鶴字子訪石井溝人治家嚴正有則自其高祖以下八世同居內外無間言人豔稱之來鶴幼習儒博聞強記設教里中垂四十

年兼通醫尤精眼科見解有獨到處治疾向不取謝遠方來就醫者資以食且贈以藥以是人皆感之邑人孫欽昂榜其門曰知圓行方汜水趙東階復贈術並丹溪匾額

李玉墀字仙階議叙六品賦性公正曉暢事理爲薛村保董正見義勇爲不避勞怨遠近推服慨捐地五畝錢五千入須右書院鄉里頌以保障桑梓匾額

李漢墀字雲階議叙八品父楷曾擬捐地仿社倉法以贍貧困未得經理之人不果漢墀承父志捐地十畝交王秉義李維新等積資備用族鄰義之刻石記其事樹之間左

耆德

馬龍駒壽一百二十四歲乾隆三十年奉旨建坊於漢寨河知縣范元颺題曰昇平人端

陳琮壽一百零八歲乾隆十四年奉旨建坊於汪廟村東題曰恩隆寵錫

法永壽法臺村農人壽一百零三歲

魏揖壽一百零二歲乾隆年奉旨建坊於西趙村

馬有仁性恬淡自書忍讓二字於座人有妄認其牛驢以爲所有者卽給之不與較時稱有卓子康劉文饒之風壽臻期頤

汪文錦字繡卿湛深醫理痘疹尤精遠近延請雖祁寒暑雨必往家本素封概不受謝衆感其德爲樹懿行碑題曰店林風高壽九十四歲

張清字漣如力農起家富甲一村居心寬厚每歲青黃不接以麥穀貸鄉里用大量出小量入力不能償者聽之歲終開放柴園任貧者自取衆頌以匾曰耆英雅度壽九十三

宋省三潔已守分不牟利不冒險安享田園之樂壽九十三
馬庚寅城南姜庄人少時家僅中資勤儉克敦不數載殷實爲一鄉最每遇勸捐率先輸將不斤斤計較多寡延師課讀脩脯從豐故

累世業農其子春霖英年入泮壽九十二

宋懋容字子溫父文昭以醫濟人有善名懋容世其業四方延請以所到先後爲序藥貲聽人自給欠不追討有不償者積久焚其簿曰不留此使子孫生心如是三次生平距步方行動循禮法年逾八旬每歲時及先人忌日猶率子弟上墳有謂其可以已者曰此吾職且禮也一日尙存禮不可廢不如此何以爲後世法孫太史欽昂贈以福緣善慶匾額行年九十無疾而終

王顯祖字煥庭質直謹厚力農務本出作入息綽有上世遺風壽八十九

孫維賢字方渠靈椿岡人幼好學弱冠入庠食餼生平無疾言遽色與人未嘗有爭守禮安分讀書外無所事光緒丁酉科恩賜副榜壽八十七

張鵬程七世同居汜水魏聯奎爲之記壽八十三

王泰業鐵工愛讀書廩生承緒其四子也壽八十三

李心廣監生質樸忠實以勤儉起家積而能散光緒二十六年歲饑出穀四十餘石賑濟須水及趙村之貧者鄉人頌以任卹風高匾額又捐入須右學校地十畝壽八十三

馬萬全精醫知縣陳贈以術妙青囊匾額壽八十二

續滎陽縣志

卷八

人物

四十一

河南商務印刷所印

侯文祥字吉齋酷愛讀書銳意興學臨終囑其長孫靜洲曰吾欲於村中設一學校汝後必成吾志壽八十一

馬成九精醫道邑進士李再可額其門曰精心獨造壽八十一

翟廣涵字泳吾性穎敏有心計業醫晚年益精認症用藥出入意表一時名醫無出其右素行元爽不事唯訶喜交文士興學尤具熱心鄉鄰旌其門曰望重閭里壽八十一

王輔洄溝人孝友志本齒德兼隆望重鄉閭行年八十鄰里親族頌以達尊有二匾額

王和回溝人恩榮鄉耆年逾八旬鄉人頌以康強逢吉匾額

陳法程字亦醇恩榮國耆平生多懿行鄉里爲立石密縣舉人侯之翰撰文

孫清源循謹自持愛使子弟讀書自奉儉約竭終歲之人以供脩脯廩生寅恭其孫也壽八十

汪金品字檢若城內人弱冠即有聲庠序以歲貢就職訓導爲人謙和嚴正不喜聲華隱居教授以終其身邑宰旌其門曰言坊行表張元福字德先容貌修偉性情方嚴不輕言笑制行教家一循禮法里有紛爭得其一言即解咸豐未避匪亂築保安寨衆推爲首願受約束悉心規畫一方賴之至若辭千金之產而不取焚五百緡

續滎陽縣志

卷八

人物

四十二

河南商務印刷所印

債券以恤貧今猶傳爲美談精岐黃有李謨子病垂危張診之曰宿食也當下李難之張曰今尙可爲緩則不救下之果愈張登庸妻左股痛不能伸張審其狀曰小腸癰也癰愈股自伸矣爲處方如言而愈其辨症精確類如此孫文生世其業有祖風

李逢源字孟資增生住悼王墳村制行端方非禮弗履性極謙和雖與三尺童子語亦恂恂然惟恐傷之足未嘗至城市有以事相干者謝以不敏教授終身從學者衆旣卒門人思之立石村外詳叙生平學業以爲後世矜式

張德富壽九

胡殿元壽九

陳有李玉成壽九

李春彥壽九

趙萬敬壽九

楊文生壽九

宋元泰馬忠李林東^{壽九}張玉璞李殿慶馬文魁^{壽九}張天貴哀士慶李

安邦孫禮魁海鳳岐李全^{壽八}李萬清李東陽程友仁李三霖陳家聲

^{壽八}程天樂呂法賢把金輿^{壽八}張士英李克儉王文聚孫天寶丁繼坤

孫建忠李進寶周傳興李元重王涵儒^{壽八}張哲劉法文孫願生屈永

福張發旺張鳳岐^{壽八}張樹德徐文生李進旺李長安沈繼善張小寅

李滿場陳景新陳景昌把際午馬乾一李廷俊^{壽八}楊文慶李慶楊文

聚張明庚張其鳳張長愷張成詩張樹坤^{壽八}陳學升張廣學李春榮

王全來馬永祿姚太平陳天順劉其清陳遂成孫丕貴張文重李國

平楊德林把際昌把廣聚李文生^{壽八}王玉河侯儉堂李同德李統林

續滎陽縣志 卷八 人物 四十二 河南商務印刷所印

李士信楚瑞五李學生李三陳士元楊茂林李伯英^{壽八}李進心^{壽八}

谷月桂^{現年九}李福有^{現年八}程魁^{現年八}時光順汪金山劉玉貴賈華貴

^{現年八}翟青山白金鎔^{現年八}侯同心張小寅陳丙炎^{現年八}時有記李廣

源孫有林李廣智^{現年八}史維楨^{現年八}張祥林^{現年八}王湘王宗儒^{現年八}劉

均福^{現年八}劉均仁^{現年八}李再修^{壽八}王景星^{壽八}宋明仁^{壽八}

李位東^{李曰庄人篇實淳僕守分畏法出作入息}自樂彷彿葛

隱逸

馬先登滎東五十里馬嘴村人也秉質穎異讀書好深長之思立身
識大體有奇節孤介自持不隨俗為俯仰生於清乾隆之末當是

時滿人入主中夏已百餘年黔首皆以爲踐土食毛沐浴於深仁厚澤而所謂士大夫者尤歌功頌德競以博一矜獵一第爲榮先登既讀書覽歷史聞父老話前朝興亡獨怦然有所感傷於懷間以所作文示一時諸名宿皆驚服以爲取青紫當如拾芥也乃其仕進之念早絕自幼即不應科第或有勸之者笑而不答然其心存濟物無親疏遠近遇有患難苟力所能爲必設法拯救尤精於醫而生平足不至城市亦不輕入富貴之門惟貧困者以病告則徒步隨之不留飯亦不受謝也嘗曰富貴之家力能延醫吾不往可易他人至於貧家醫士每不屑顧既求吾安忍却之故當時有

馬善人之名咸豐十年捻匪擾豫駐營密邑之觀音堂滎之東南境多被其害獨於先登村外樹旗爲標識相戒勿犯行醫之暇手不釋卷尤喜讀周易玩索有得便欣然忘食偶爲人占課輒有奇驗又精韻學著韻學指南四卷今已佚同治中年卒臨終自製漢衣冠囑其子曰殮我必以此時人亦不知其故也

方技

宋捷三字錫堂小京水北岡人幼貧不能讀從歲貢生宋鳳起學醫盡得其術痘疹尤其所長鄭縣李國政晚年始生一子患痘甚劇羣醫束手心危之延其診治診畢曰症誠險幸非逆也爲處方曰

服二劑至某日當起長某日當灌漿某日當結痂保無他虞惟灌漿時尚須一診及期復請診視曰尚須服藥否則面麻又製一方囑服二劑安然獲痊皆如所言面亦不麻常庄王大群患大渴飲水不止醫藥罔效捷三診之曰診此寒極似火也投一大劑參附立止鄭縣生員王世勳妻屢小產求醫治曰此宜調理於未胎以前保護於受胎以後每月必服藥數劑乃克收效非一診能爲功也如其言每月一診未幾受孕胎果不墜子亦遂育其識症精確用藥奇妙皆如此類性廉介有爲備診封者無多寡皆却之曰吾生平未嘗受此以食物酒果饋之則受有謝以弊帛者必反還之

或懇其收用以表謝忱則曰君子愛人以德必欲受此是遺吾以貪也幸無相強鄰里親友無以圖報公頌以匾文曰著手成春卒年七十有九子廣述世其業

宋辛酉字位西自其曾祖文昭祖懋容皆以儒醫有名當時辛酉幼業儒府縣試屢列前茅以文通命蹇年愈三十未博一衿翻然曰功名身外物反不如纘承家學尙克於人有濟遂潛心研究於素問難經諸書已能洞悉本源猶不自足受學於馬先登先生之門益入深奧確有把握然後出而濟世藥到病除如桴應鼓於是名振一時以脈候決人生死絲毫不爽有回民馬姓氣已絕而身尙

溫診之曰此暫時氣閉非死也一藥而愈又有鄭縣鳳凰臺宋姓者自城歸偶不適行不半路恰與之遇急求診甫着手曰脈已絕當速歸緩恐不能及家其人果死途中凡不治之症其死或遠在數月之外或近在旬日之間據脈預斷無不驗者鄭州牧焦仰之贈以仙手佛心匾額卒年七十有一子樹琴增生樹棋歲貢皆以醫名孫多三畏三能世其業世居城東五十里府君廟本榮人先世入鄭縣籍且行術嘗在鄭境鄭人艷其名故亦載入鄭志

白鶴鳴字壽亭三李村人父慶堂以罵賊遇害賜卹雲騎尉世職鶴鳴承襲歸撫標左營効用博極羣書尤好岐黃家言於病症脈理

靡不洞悉醫名噪一時所至人爭延之活人無算署光州黎家集守備卒於任子紹曾能世其業論証洞徹根源剖析微茫無不應手奏效人稱爲仙手佛心

宋運善字普齋議叙八品小京水西岡人累世皆儒醫從祖輩鳳起廩貢澤溥恩貢皆醫名噪一時父開第以增貢生懸壺須水鎮善針灸其胞叔家定以諸生官湖北爲藩臺劉齊銜所推服運善紹家傳有心得處方不尚奇異悉依古法而投無不應幼科尤精鄉里頌以道闡靈樞匾額其胞弟運時廩貢堂弟吉人附生皆以醫顯子其義其瑾世其業

張書林水牛張村人家本小康幼時讀書畧識字然非所好同里韓某學拳術於汜水萇氏萇氏者世傳少林祕法一方之巨擘也書林聞其風而慕之乃從韓學數年盡精其術且有自修獨得之妙能魚游馬行萇氏學規以謙讓和氣爲主不輕與人較技故數傳子弟皆循循退讓張雖有能平時不輕示人人亦未之奇也清咸同間捻匪猖獗擾豫境時太平已久民不知兵鄭滎一帶居民皆築寨以避之張適遊於野遇匪騎即持槍刺之張順勢奪其槍控之馬下匪急鳴螺騎麕集張見勢不敵即躍入路旁潭中匪以矛探之深無底曰死矣將去張忽現首於北匪急馳往張已潛

自南岸出矣匪急策馬追之張手足並行風馳電掣而逝瞬息至寨中滎東四十里有鎮名曰須水鎮每年正月七日鄉民演戲賽會以媚火神衆以萬數時有山東豪客數人牽一野貓並弄各種兵器銜於會場鄉民有侵其圍場者豪客怒始而詈罵繼而鬥爭遂放野貓舞刀大呼衆辟易張適在旁有知其能者推之使前與角豪客佯奔張追之接踵矣豪客忽反身舉刀劈其首張急側首持其腕縛之有自崖上觀者曰吾見張之首已落矣乃反擒賊也張之名遂動一時光緒三年歲大饑張不事生產至是家更貧乃持器物至須水鎮鬻之以易食己與錢矣賣食者父子三人弗之

承其子二人各持張之一足欲牽倒衆辱之張以二指拊其父頰父急呼曰速釋手否則吾命休矣傍觀有識張者曰汝父子知此人爲誰而敢與之鬥耶曰乞丐耳曰否此卽昔年在本鎮赤手擒豪客之張某也父子大驚急釋手稱謝張抱技無所用晚年貧無立椎爲村人守廟人呼爲干胄云

流寓

薛瑄字德溫河津人父貞洪武初領鄉薦爲元氏教諭母齊氏夢一紫衣人謁見已而生瑄性穎敏甫就塾授之詩書輒成誦日記千百言父貞改任滎陽瑄侍行時年十二以所作詩賦呈監司監司

奇之旣而聞高密魏希文海寧范汝舟深於理學貞乃並禮爲瑄師由是盡焚所作詩賦究心洛閩淵源至忘寢食後貞復改官鄆陵瑄補鄆陵學生遂舉河南鄉試第一時永樂十有八年也明年成進士以省親歸居父喪悉遵古禮宣德中服除擢授御史三楊當國欲見之謝不往出監湖廣銀場日探性理諸書學益進以繼母憂歸正統初還朝尙書郭璉舉爲山東提學僉事首揭白鹿洞學規開示學者延見諸生親爲講授才者樂其寬而不才者憚其嚴皆呼爲薛夫子王振語三楊吾鄉誰可爲京卿者以瑄對召爲大理左少卿三楊以用瑄出振意欲瑄一往見李賢語之瑄正色

曰拜爵公朝謝恩私室吾不爲也其後議事東閣公卿見振多趨拜瑄獨屹立振趨揖之瑄亦無加禮自是銜瑄指揮某死妾有色振從子山欲納之指揮妻不肯妾遂訐妻毒殺夫下都察院訊已誣服瑄及同官辨其冤三却之都御史王文承振旨誣瑄及左右少卿賀祖嗣顧惟敬等故出人罪振復諷言官劾瑄等受賄並下獄論瑄死祖嗣等未減有差繫獄待決瑄讀易自如子三人願一子代死二子充軍不允及當行刑振蒼頭忽泣於爨下問故泣益悲曰聞今日薛夫子將刑也振大感動會刑科三覆奏兵部侍郎王偉亦申掾乃免景帝嗣位用給事中程信薦起大理寺丞也先

入犯分守北門有功尋出督貴州軍餉事竣即乞休學士江淵奏留之景泰二年擢南京大理寺卿富豪殺人獄久不決瑄置之法召改北寺蘇州大饑貧民掠富豪粟火其居蹈海避罪王文以閣臣出視坐以叛當死者二百餘人瑄立辨其誣文恚曰此老倔強猶昔然卒得減死屢疏告老不許英宗復辟拜禮部右侍郎兼翰林院學士入閣預機務王文于謙下獄下羣臣議石亨等將置之極刑瑄力言於帝後二日文謙死獲減一等帝數見瑄所陳皆關君德事已見石亨曹吉祥亂政疏乞骸骨帝心重瑄微嫌其老乃許之歸瑄學一本程朱其修已教人以復性爲主充養邃密言動

可法嘗曰自考亭以還斯道大明無煩著作直須躬行耳有讀書錄二十卷平易簡切皆自言其所得學者宗之天順八年六月卒年七十有二贈禮部尚書諡文清弘治中給事中張九功請從祀文廟詔祀於鄉已給事中楊廉請頒讀書錄於國學俾六官誦習且請祠名詔名正學隆慶六年允廷臣請從祀先聖廟庭

案先生年十二侍父貞於滎陽任所河南參政陳宗問行屬至滎陽聞先生能詩索觀贈以句云知爾晚來成大器願修德業贊雍熙且序之曰觀其所作才充氣廣不數年間將見學問淹通聲名洋溢祿位不卑非余儕備位苟祿之可比矣高密魏希

文海寧范汝舟皆深於理學者父貞聞之並禮爲師命先生受業與講經史魏范退謂人曰聖門有人矣結爲小友不敢以師自居由是先生乃究心洛閩之學精思力踐事必質諸先賢一有不合輒忘寢食厥後父屢遷官而滎陽舊有別墅家屬實寄居焉先生雖入鄆陵籍舉河南鄉試第登永樂辛丑進士第而懋功積學實肇於滎陽洪熙元年貞歿河內學署先生扶柩西歸葬訖復來滎陽省母知縣沈復深器重之先生有送白司訓暨滎陽送別圖詩序皆受沈命而作並爲沈之兄銘墓於此知先生蓋寄居於滎陽也又嘗讀河汾文集有送王世寧歸覃懷

序送索亭驛丞湯伯瑀序送永和湯大尹序皆作於滎陽則先生之寄居於滎陽者爲最久愈可知矣滎陽人士追思先生之所以不朽者能勿俯仰情深哉 補

張樹聲原籍懷慶府原武縣由舉人爲滎陽縣教諭因家焉

張濂堂樹聲子嘉慶乙丑進士翰林院庶吉士江南沐陽縣知縣太

倉直隸州知州

張兩同濂堂子禮部員外郎

李載文滎澤歲貢

張榮勳字玉如原籍順天寶坻縣人性至孝母病割股和藥以進鄰

續滎陽縣志

卷八

人物

五十一

河南商務印刷所印

里至今猶稱道之

丁鏗字雲樵原籍江蘇人曹州府知府

于承德字潤吾原籍直隸靜海縣廩生候補知縣光緒二十四年遷滎

王夢熊字吉甫原籍直隸天津縣世襲雲騎尉光緒二十六年遷滎

王韶華字芝和原籍浙江會稽縣人吉林賓州府地方審判廳推事

徐錫珪字少圃原籍浙江諸暨縣人貴州永從縣知事

張潔字錫三原籍直隸天津縣人新鄭縣知縣

袁惟和字柳臣原籍湖北江夏縣人捐入學校地十一畝六分褒獎

一等銀質嘉禾章

續滎陽縣志

卷八

人物

五十二

河南商務印刷所印